



23. januar 2014

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

Naalakkersuisunut apeqqutit Naalakkersuisut paamaarussinerat pillugu:

- 1. Suna pissutaava § 37 naapertorlugu apeqqutima nr. 121-p akiniarnera ukup affaanik sivissuseqarsimammat naak teknikkikkut pisariunngilluinnaraluartut? Piumasaraara torersumik eqqortumillu akineqarnissara asuli teknikkimut tunngasunik utoqqatsissutissarsiorasi soorlu oqarlusi allakkap suliarinera kukkusumik pisimasoq.**
- 2. Suna pissutaava § 37 naapertorlugu apeqqutima nr. 184-p akiniarnera ukup affaanik sivissuseqarsimammat naak teknikkikkut pisariunngilluinnaraluartut? Piumasaraara torersumik eqqortumillu akineqarnissara asuli teknikkimut tunngasunik utoqqatsissutissarsiorasi soorlu oqarlusi allakkap suliarinera kukkusumik pisimasoq.**
- 3. Naalakkersuisut ataani atsiortunga isumaqatiginerlunga oqarama apeqqutima 121-p 184-illu akiniarnerisa sivissunerat kanngunarluinnartoq aamma tamanna pillugu Naalakkersuisut siviisuumik akissuteqannginnertik pillugu ataqqinninngitsumik iliornerit pisortatigoortumik Inatsisartunut utoqqatserniarpat/ajuusaarnertik apuunniarpaat?**
- 4. Paasivara Naalakkersuisut allattut, allagaatinut takunnikkumallunga qinnuteqaatiga apeqqutinnut normu 184-mut ilaasumut akissut piaartumik tigujumaaringa Naalakkersuisut suliniutit suut aallartinniarpaa qulakkeerniarlugu, innuttaasut allat uattulli arriitsigisumik unioqqutitsisumillu sullinneqannginnissaat?**

(Inatsisartunut ilaasortaq Jens B. Frederiksen, Demokraatit)

Tunngavilersuut:

Inatsisartut Naalakkersuisullu suleqatigiinnerat paatsuugassanngilaq. Inatsisartut Naalakkersuisunut sulisitsisuupput. Tassa ilaatigut imaappoq Naalakkersuisut pisussaapput Inatsisartuni ilaasortat pisortatigoortumik apeqqutaannut akissuteqassalutik. Apeqquteqartoqarsinnaavoq ilaatigut Inatsisartut Suleriaasianni § 37 naapertorlugu.

18. juli 2013 – ukiup affaa matuma siorna sinnilaarlugu – ajornanngitsuaqqanik pingasunik Naalakkersuisunut apeqquteqarpunga. Apeqqutit taakku 121-mik normoqartut aatsaat akineqarput.



Aamma taamatorpiaq pisoqarpoq apeqqutinnut 184-mut tunngatillugu. Apeqqummut tassunga akissutit aatsaat qaammatit sisamat ingerlareersut akineqarput.

Paasisinnaangilluinnaqqissaarparar qanoq ilillutik Naalackersuisut piffissaq taama sivisutigisoq atorsinnaaneraat apeqqutit ajornangitsuaqqat akinissaannut taamaattumik piumasarivara eqqortumik akineqaqqullunga suna pissutaanersoq taama paamaarussinermut.

Qulaaniittumi apeqqummi takuneqarsinnaasutut kissaatiginngilara akineqarnissara, sivisuallaamik akiniarnermut pissutaasoq ”kukkusumik allakkap suliarineqarsimanera”.

Apeqqut normu 184 eqqarsaatigalugu, apeqqutima taasuma iluaniippoq allagaatinut takunnikkumallunga qinnuteqaatiga. Piumasaqaatit taamaattut Pisortat ingerlatsinerat pillugu paasitineqarsinnaatitaaneq pillugu Inatsisartut inatsisaanni nr. 9-mi, 13. juni 1994-imeersumi § 16 imm. 2 naapertorlugu – akuerineqartussaapput itigartinneqarlutilluunniit ullut qulit iluanni. Maannakkut ullut 120-t ingerlareerput sulilu utaqqivunga.

Eqqarsaatigaara taamatut akuerineqarsinnaangitsumik utaqqisitaanera Inatsisrtut ombudsmandianut naammagittaalliutiginiarlugu.

Apeqqutit tiguneraniit ullut suliffiit naligninnaasut qulit iluanni apeqquneqarput. Misilittakkalu tunngavigalugit taanna uteqqippara naqinnerit angisuut pualasuullu atorlugit.

APEQQUTIT TIGUNERANIIT ULLUT SULIFFIIT NALIGINNAASUT QULIT ILUANNI AKEQQUNEQARPUT.